



皇甫少女集卷二

少女山人吳郡皇甫湊撰

樂府

春宵引

高掌粲興霞雙闕颺輕飆玄陰苦修夜華美不
崇朝靈池蕩寒氛柔雪歛陽翹裔裔豐景入灼
灼淑晷饒期君騁逸轡方駕踐春宵

明月引

玉繩光早艷金壺宵未沈佇立春花月等怨秋
河陰方驚移翠牖遙睇入鸞林澄醪我姑酌縈

絃誰賞音留輝眷羈影流彩託微心

對酒曲

叢臺寒送杵淇水昨漸裳旅思鴻遵渚勞歌蟀
在堂承波微啓夜下葉早違霜鄭袖垂初拂齊
衾爛已張清光正三五莫遽怨朝陽

折楊柳

陌上看楊柳依依滿洛川良人從遠戍春色動
經年葉暗金窓裏花飛王鏡前臨風獨攀折心
思亂繁煙

梅花落

素蕊艷窓紗寒閨歷歲華不堪疑對雪何許定
驚花影惜紅粧變香慙錦帶賒妾心零落盡猶
自憶龍沙

紫騮馬

騮馬躑金城桃花嬌玉纓從來汗血種不愧絕
塵名協月竒姿表凌風逸態生願言酬隱渥服
御帝臺行

巫山高

巫山峯十二窈窕映江流翠壁濃銜日丹楓遠
帶秋神驚珠珮杳魂斷玉鸞遊猿響空岩夜誰

堪達曙愁

隴頭水

分流懸峻坂嘶馬度寒山月照潺湲淚霜凋離
別顏笳聲雜隴樹鴈影沒秦關寄語金閨婦終
持漢節還

銅雀妓

帷牀棲累樹椒鶴鎖深宮花月常如昔君王不
可同綺羅芳愛盡臺館御遊空惟有西陵樹時
時入望中

王昭君

已恨君恩絕仍憐遠道難塵經蘭麝歇霜染
蛾殘虜帳催晨發胡笳慘夜寒玉顏常自惜休
倚鏡臺看

出塞曲

昨夜羽書驚追徵六郡兵龍車臨廣武虎士會
平城苦戰胡雲落長驅漢月明惟應霍驃騎萬
古共雄名

雨雪曲

邊雪舞空來紛紜像落梅愁雲凝虎帳斜日隱
龍堆色亂瑠戈慘聲沉畫角哀直言銀磧度詎

恨玉門回

長安道

御柳垂溝發宸花夾道開明光連騎入平樂觀
雞回郭况方疏穴王根正起臺望塵多逐彈別
有副車來

芳樹

芳樹吐春姿列映寒塘側發日染朝妍流雲深
夕色連巖望如黛氛氲遙可拭玉筋泣掩閨金
鞍游去國韶光忽以逝攀條坐成憶歸從谷口
居長林聊偃息感往時豈再悼別愁屢極夜來

青葱夢彌晒樗散植

臨高臺

高臺臨茂苑畫棟俯滄波東涵鉅海銀濤壯西
繞連山翠影多瑤樹丰茸輝曉日雕甍粲艷薄
宵河千衢柳色旗亭引百里花光寶舳過別有
朱樓春日暖南隣北里笙歌滿紅桃偏照浣沙
裝錦鳥時迎踏青伴梁生隱會稽寂寞自攀躋
芳樹遊心斷浮雲望眼迷銅雀歌聲慘啼鳥曲
恨悽九華幾見遊麋鹿三休無復切雲霓直須
逃名百代後無事身退五湖西

春宵歸鴈

吳溪二月梅花暖北鴈歸行聯復斷繫足偏憐
寄遠書飄音屢雜相思管楚雲遙遙連塞臺關
山月照客心哀長安日邊爾應度爲憑清影暫
徘徊

東飛伯勞歌

清漣交頸戲文禽曹王羽芝停洛潯誰家新粧
絕妍華羅紈綺績日開霞鳳閨銀燭芙蓉帳孔
雀金屏兩相向年餘三五嬌容媚明眸宛轉傍
宜侍可憐如花風逐波留芳待君君柰何

其二

驚鳥啼夜鶴迴翔綠珠碧玉遙相望誰家搗素
步蘭墀緘情忍意有所思金鋪珠綴瓊簾靜銀
河斜月流輝冷華容二八芳年歲蛾眉瓠齒姿
絕世落花從風花復新空留可憐愁度春

流水引

白日下兮江沱秋風生兮綠波汎澹澹兮逍遙
曼予目兮中河揚翠蓋兮掩青蘋停桂楫兮翳
雲蘿芰覆沚而難入佇澤蘭之幽芳蕖的皜以
丹曜粲明霞之夕光望羅袖之窈窕聿鳳翥而

鸞翔歌采蓮以容與聲幻妙而復揚哀遊菰之
清露指皓月而自引蹇誰留其盤桓諒予情之
紆軫重曰木葉落兮露已寒思嫵婉兮隔雲端
冀一歡之可畢幸餘芳之未殫且弭節以忘憂
緬佳期而竊歎獨鬱鬱其誰語聊宣之乎弱翰
鞠歌行
烏有鳳兮鱗有鯢超騰景雲絕羈樊俯東海瞰
西崐促齡短世愁煩寃履太行摧車轅同揉玉
石誰爲言牙絕絃期不存中心孔悼聲自吞河
易清思難緩永嘅今昔腸若燔

殿上曲

王春肇昌紀帝德仰文思明堂展肅翼嚴佇重
輪熙翔杓迴青天鳴鼉震嚴扉穆虞發遙警乾
行扇巍巍泰階協百祉華蓋濫鴻私峻雲靄懸
陛敷藻鑠瓊棖垂衣龍始御前闈鳳甫儀玉帛
總萬國書文會八區祥謠浹居圉川嶽固皇基
承天之嘉頌跂踏奉崇微

君子有所思行

崇墉升朝日垂曜臨九衢華闕鬱崔巍明明福
天居通波象漢流飛拱憑雲舒夙謬邦君顧矯

迹履皇都振纓建禮闈結綬承明廬貞軌豈足
由枉徑易回車鼎鉉或窘步夸毗爲良圖繾綣
生毛羽俛仰間榮枯惟子湛道德盤桓亦奚須
柔條結芳風藟蔓緣高隅始願不及終拊心獨
嗟吁封已眷初服長與沮溺俱

出自薊北門行

虜氣結陰山軍聲動五原詔屯七萃士戈戟蔽
霜天建纛憑怒啓授鉞出燕關壘和違受命效
節策中堅銜枚衝積雪驅馬涉冰川嚴圍宵再
合鳴鏑屢驚遷兵交亘歲月圖令竹帛宣諒蹈

匈奴庭一鼓隳戎旃揚徽玉門道飲至勞歸旋
方陪屬車後紀禪奉登刊

結客少年場行

俠客氣何雄藏名軹井中四豪傾長事肅駕遠
相從遨遊空絕影顧眄遺英風純鈎扈錦帶潛
穎結長虹急讐歛電發怨吏不敢逢探丸入漢
市挾匕登秦宮千金購姓字三辰貫幽衷顧嗤甘
陳侶邀爵事邊戎

有所思

惠風扇芳氣鮮雲照蘭林舞簾晴綺滿遊艇翠

波深自我塵瑤鏡載聞黃鳥音羅帷月自入歎
恨徒盈襟

淮堤曲四首

城交綠水傍遠近汎樓光嬾棹愁堤盡淮堤幾
許長

其二

烟草湖心劇雲花浦口迷淮南好風景多半屬
淮堤

其三

楊柳拂湖波淮堤湖水多倘因團網去惠爾採

菱歌

其四

棹女碧波遙花香錦帶飄言珍芍藥贈耐可比
容嬌

朝天歌二首

鳳侶鴛鴦行滿禁闈晨隨旅篋近宸威春風緩落
黃金陛會有天香到褐衣

其二

雙闕春明簇瑞煙遙依玉掖聽嵩傳日邊仙珮
雲中樂龍輦輕移在九天

揚州詞二首

龍舸千群錦岸長
河堤萬騎羽林郎
綵雲似度霓裳曲
碧草猶含粉黛香

其二

錦纜牙檣駐翠華
維揚瓜步渺烟沙
冰河不爲東風解
桃李爭開臘月花

江南曲

百花洲上望春暉
昨夜春從枝上歸
乍想江梅妬江月
忽驚飛絮如飛雪
美人流淚濕羅裙
欲寄音書那得聞
孤帆片片高唐雨
粧臺寂寂巫

山雲紫燕雙飛畫
梁裏薄暮春風度
羅綺江南春色不可留
我憶江南行復愁
妾心願附盤龍鏡
携將淚影玉關頭
連理枝間春幾度
花開花落夢悠悠

望春曲

桂棟燕來時
楊柳未成絲
徒然對尊酒
無處覓花枝
宿雲時吐岫
晨溜更添池
江洲千里綠
憑此寄相思

古辭

華年不恒處
游子輕遠別
風波頓万里
徒使心

斷絕邊朔氣早寒方秋見霜雪盈思阻雲海含
悽弄刁篋我有鴻鴈音傷茲桃李月

中婦織流黃

東隣有思婦殘機中夜開衣聲遙綵繡腕影自
徘徊桂寒知氣肅綵長覺漏催鴻鴈將愁遠絡
緯共鳴哀隔漢星難渡聯雲錦易裁欲知腸已
斷繁梭日幾回

桃花曲二首

潞河有桃花口甫子過之悅其名而
惜不見一花也因為賦此

問訊桃花口尋芳悅爾名啼鶯不住囀知我繫
舟情

其二

落錦已芳塵殘江非暮春桃花不待客芳草欲
迷人

北斗篇

北斗迴高明陽氣宣九垓俯垂青達日遙接紫
宮春撫時激壯節覽鏡嗟沉淪扃巖多末軌廣
步焉足循雜霰下階扉寒色餘荆榛窮巷無行
車不耻長臥人我辰諒安在雲龍一朝伸朝奏

暮還召主父寧久貧裂土貴一言歸爲五湖賓
男兒重快意鍾鼎非所珍寓言復痛飲書懷告
情親昔賢未可測思與范蔡倫

游仙

層林隱瑤碣石房構雲楹寒山永鬱岬靈谿自
迴縈揭來厭塵網微志徇長生投骸偈榛塗駕
鶴履芝庭舉手攀若枝游目玩蓬瀛旣撫姮娥
絃亦聆王子笙容成悅朋來安期眷同升衆仙
歛莅止瓊鑿翩相迎高蹈謝世人何時復來并
竒齡叅日月豈爲物象傾

順東西門行

出西門步北郭行歌發商眺寥廓孟門道呂梁
壑他人有心豈予度化密移景昭鑠嗟古之逝
誰可作數苟竒生不若朝爲繁華夕零落聊永
日命深酌何以自寬樂三樂

九日橫塘曲二首

蘅薄晚流芳菱歌闕綺粧願因塘上月拂袖舞
君傍

其二

我有潘安賦偏多宋玉愁今來對山水忘却故

園秋

寒夜曲四首

碧殿金風生綺紈
宮槐吹盡不留殘
沉沉月到苔陰上
添却簾櫳無數寒

其二

空庭藹藹月凝霜
銀燭無光玉漏長
清漢數聲征鴈度
夢回中夜憶遼陽

其三

寒切雕窓透錦茵
殘更望斷履綦塵
空閨不恨飛霜夜
總使春來益黯神

其四

玉衡低戶夜無聲
月色籠寒照不明
燈火漸催迎早歲
綠窓愁殺近啼鶯

皇甫少玄集卷三

少玄山人吳郡皇甫湜撰

扈從

丁亥之冬車駕有事於山陵予以儀曹
扈從

肅躬事陵邑崇衛陟園丘弭情蹕露苑銜郵頓
霜疇感深側淪化孝達茂光猷宵冬夙嚴駕曙
彩乍揚旂鸞笳警寒月軒軒翊素虬凄飈循埏
響離靄匝垆浮瑤禕衍帝穆玉寢開聖憂資縞
泣始瀝曳緜芳未道瞻樞疾電忽登渚悵虹流

爰發熙乾纘時文濬隆周鴻徽軼往薦禋懿裕
來休飭嘗諏卜揆升鬯衍玄幽沐恩奉行役服
義切思謳哀風庶結撰景雲方出游

冬日從駕山陵五首

鼎湖風露積橋山烟霧深哀敬鐘嚴寢順動蹕
穹林霞闕迎晨旭霜眇引鸞音萬騎屯蒼巘千
旅藹碧潯

其二

鳳野移宵漏虎戟警宸威連營奕漢轉登隴朔
雲飛乍聽征笳發時聞候騎歸心旌懸捧日藜

藿愧輕微

其三

帷宮徙澗道緹縠擁巖隈山川百神扈車駕七
陵來旌文巒氣肅鉞影日華開愧乏球琳饗徒
聞枚朔才

其四

霄磴窮巖險化迹表玄幽松風揚玉隧桂霧隱
珠丘俎豆因時展衣冠異月遊百王旣以邁千
祀諒非修

其五

八埏總休瑞萬寓浹民和復此歲蕤日侍駕靈
山阿闕殿金芝滿甘泉玉樹多方觀景雲出珥
筆奏昌歌

初夏金山扈遊恭述十二韻

南極春星改西岑晝景長奉慈移輦出詔幸指
山陽淑氣圍晴靄靈河瀉曙光先驅蹕御宿侍
女發披香翳日雕麾引凌空翠憶翔鯨波仙杖
外龍沼禁城傍劔躍彤巖晃鑿飄錦瀨鏘帷宮
扶玉樹緹騎繞金湟跨谷虹梁屬䟽霞鳳陞張
峒山期問道瑤水戒巡方鳥下宸襟洽雲飛寶

思揚昆池寧習戰文德佇來王

西湖行樂辭六首從駕山陵作

綵霞迎曙雨光收御幄城西蕩碧流青鳥遙依
仙母扇白魚偏入武王舟花含瑞日千旗映柳
拂和烟兩岸浮自慶叨從簪紱後獨將麗藻從
宸遊

其二

千峯翠靄俯神池傳道花間奏水嬉簫鼓疑從
雲際起旂旌若在鏡中移香臺抱日團朱麓靈
樹含春漾碧漪文物歲蕤承聖主太平遊豫盛

前規

其三

先朝遺迹在層巒西望行宮紫翠蟠金洞松陰
曾駐鶴瑤壇竹實舊樓鸞重開日月邀仙賞長
繞雲霞扈帝觀北極幸霑堯酒澤南薰願嗣舜
琴歡

其四

衛士傳呼蹕上方才人一半下昭陽嬌臨綠水
承恩賞艷比紅霞出世粧澗吐銀潢流帝樂花
開珠樹散天香皇家不避寰中暑自有金莖玉

露涼

其五

鸞輿晨下鳳城來藻景文波相映開丹仗遠隨
金鷲轉錦檣齊拂石鯨迴直從花裡披仙苑疑
向天中結帝臺長奉慈遊歡不極未央今笑萬
年杯

其六

君王孝德本光天龍舸春遊霄漢邊微靄起時
窺鳳嶺瑤星流處指虹川日薰山氣凝成彩風
入鑪香散作烟扈從謬叅枚朔侶銜恩還欲獻

甘泉

五日廷宴和唐陳二編修

北闕晴雲晝漏聞中天麗日綺筵分魚歌鎬宴
歡依藻鳳舞虞絃曲奏薰蘭葉正調仙鼎實榴
花初泛御杯芬更誇續命傳金縷願以堯年祝
聖君

平臺山扈從

昔駐文皇輦歡傳萬壽杯誰言紫霄上重見翠
華來曉樹峯巒合春花棟宇開勝圖臨塞壤嘉
蹟改平臺豫蹕承雲轉靈旂繞澗迴捫天叨法

從遊聖愧仙才

省署

朔旦候朝紀事二首

正殿春朝朔蒼旂發五鍾仙歌應翥鳳法駕擬
驂龍候履星初落趨闈霧稍濃已聞傳聖豫還
想觀天容

其二

瑞旦莫先啟韶光柳半催三軍銷殺氣五老暎
星台武德超前紀文華集上才空憐襍被客鶴
鷺日趨陪

贊治堂詩

往欽崇濬哲俾率感幽玄聖情凝岳命熙化懋
殷年恭交符帝軌隆纂眷英賢靈蘊啟頽焚孚
議值昭宣惠澤滋漢流洪構憑雲騫端榮抗彤
霞交疏揚綵烟泪越麗太微迢嶢輝中天廣猷
適靜謐敷緯宴嬈娟奕奕宸藻煥皎皎列宿懸
惟昔建邦禮委紀振昌言朝夕表震兌壇圻辨
方圓億祀會有極百度率無愆升禋暢人神洽
祉悅鱗翰從文道斯集鑒憲義所甄德偉遠彌
亮馨烈久更延載瞻忝末位陳頌愧茲篇

夜直虞衡

藹宇撫獨夜廣庭發虛照雨餘雲氣清披襟坐
森奧涼風四面至踈林月微曜寢務釋我勞澹
然協所好俯慚乏才智空最孤貞操時往化屢
遷名存事多謬逝矣山澤遺紛穢殊苦約即文
懋有恪譽尤良畏蹈處順謂可怖終想東山嘯
且秉委吏心寧貽衆賢誚

春日移居

移居春日暮蓬轉跡俱輕計拙勞何補名微恨
敢生畱連花拂袂歷亂絮隨纓更有相將燕飛

鳴感去情

移居五首

修景無留序朱明已盡移每多漂轉恨正奈別
離時惜去雲空倚含愁雨欲隨吾廬一回首竹
石自江湄

其二

地濶關河北山長殿闕西吏情天外遠鄉思日
邊迷江海方容往蓬蒿或可棲弊帷新未得能
厭數相携

其三

世事易爲感吾儕有闔廬未嫌煩里旅終念近
皇居清曠心宜得歡娛計莫疎王猷還愛竹曾
使拂秋虛

其四

省暇情營逼浮生苦不禁草明晞露意蔓弱裊
風心且自看塵甑無須問舍金燕南思骨肉愁
絕倚樓吟

其五

通籍名殊忝西墉暫與期守玄非顧默得白定
從衰黍谷寒光劇榆河月漫悲琴鳴山滿室予

慕古人爲

省中述懷

鑪省炎蒸起坐妨水波雲動似生涼荷花若共
違三伏棣萼何堪滯雨鄉別去緘題能自少貧
來假貸不辭忙土風移住腸今斷更聽蟬聲滿
夕陽

冬日齋中遣抱

起坐空齋悵有思上冬雲物倍天涯負霜孤鶴
時看影照日餘花欲墮枝一別素綦蓬鬢改數
拋緗帙壯心知長愁假翼同懷側霞海冥冥去

不遲

皇甫少玄集卷三

皇甫少玄集卷四

時序

早春雜詩

少女山人吳郡皇甫湜撰

緬丁休役暇非復念行藏葺林西郊外放歌東
溪傍滄波蚪鸞影幽藪雲霞光晨起聆候禽則
知歲載芳靈雨降膏澤和風自飄揚含蕤挺故
媵伏泉湧新防白室但虛偃青山惟坐忘逍遙
歲寒娛覆以悲春陽

早春寓目

玉竦晴光起銅龍淑氣鮮和風雕檻度曙靄絳

河連水動蘼池早香歸蕙殿先庭梅微綴雪宮
柳漸浮烟麗日銜珠網新霞綺錢西山重錦
外南圃萬花前靈鮪攄鱗躍時禽挾翠翮客心
將物色貽蕩不勝妍

春朝雪後

拂曙啓荒扉雪照蘭林瑩迥榭眺氛氲層原閱
彌亘春動鳥數聲晴開烟一徑欲訪垂綸人悠
然五湖興

早春雪後看雨

雪罷清江曙春隨細雨來郊西好風景柳色半

樓臺散漫兼空淨芳菲觸處催行雲自無意恠
得潤莓苔

久雨

冥雨春城暮凌江棟宇浮雲蒸平巨澤颺迥蔽
崇丘林鳥鳴何意溪花落自愁長懷訪任釣萬
里獨乘流

雨和子約

巖陰朝帶霧川氛時掩曦襲鱗雲正聚翻泉雷
忽垂疊疊林氣交虺虺震響移瞻空乏矯翼逐
泛有傾藜軒幌搖波色衣烏染苔滋方懽偶沮

溺秉未問東菑

春懷

芳霧歛岡岑華日照川隰散曠暄氣迎延佇惠
芬集寒條兢已熙朋鳥鳴相及即事聊淹留眷
物重維繫美人曠不并徒此春風入

春日齊中即事

仲春氣妍和崇蘭幽可搴開軒眺遠野文霞靄
曾嚙黃鳥鳴芳菲綠蘋泛清淺感物懷古人緇
帙聊自展嘗欽柳下黜頗悅邴生免苟持齊物
心得喪兩俱遣

後湖官舍春暮漫興二首

湖上春歸早雲山滿目愁洗心成浪語終日對
滄洲

其二

啼鳥青山舍飛花碧樹林金門雖異跡避世且
同心

晚春對酒

幽獨寡懽悰齋扉賦雲物稍從禁火謹方追曲
水後春心不自持春事遽云訖語燕驚空帷飛
花笑羈紱澄江碧遺施遙巒翠岫吻旨酒以遊

遨無爲坐委鬱

晚酌聊賦

雲歸遙情結山迥孤懷寄靜矚池卉交停瑟娛
景媚予本丘壑人牽謬廁朝寺違跡撫墜辰索
處謝凋志中林夕鳥鳴無爲亂腸思

雨坐

偃息苦昏墊營房氣已踰溪冥疑臘在花落果
春無

霽

山城漸霽色墟野展輕烟鶴影迴容日江聲流

暮天清風到戶牖高興動林泉落照散屨杖滄
波思扣舷

上巳篇

雲起成周地春深河曲祠茂弘華轂羅賢日束
晷黃金賜對時平明結伴閭門出歌舞春陽麗
服宜橫塘水滿桃花色繡舫雕欄翠幙移穿桃
傍柳清川宴灞水流杯那足羨酣賞唯愁西日
沉人情但使浮雲變美人攀花玳瑁筵王孫歸
馬珊瑚鞭花容馬影紅相亂劇樂畚爲衆所憐
東山却憶觴咏輩洛浦爭疑環珮仙片片波搖

范槩日霏霏憶舉越溪烟錦繡山川非畫裏吳
越興亡真眼前人生爲樂當及時世上無過達
者賢淒涼斷魄蘭中續寂寞虛名楔外傳恐君
厭盡華燈醉不惜高歌上巳篇

良辰行二首

四月十四日吳人相傳仙降日也子
循弟作詩紀之余遂賦此

朝陽生東海景曜被神州翩翩青鸞羽遠自崑
崙丘三珠粲其榮翔輝薄天浮容成歛戾止宓
妃方來遊

其二

祥飈扇桂樹宮闕鬱中天良辰忽我與舉手謁
衆仙六翮乃我體參駕凌雲烟遨遊樂相樂遐
哉億斯年

五日

長夏園林過客稀青山終日欵柴扉支離且念
從吾好瓠落那辭與物違多病無端簪笏在滄
洲何事歲華非不知鳴鳥愁中變漫倒花卮送
晚暉

夏日偶作

別都謝明略懷痾感歲時方歎青春逝忽驚朱
明移蘭崇露初滿桐引雲彌滋餘花分照砌幽
鳥各鳴枝寂寞君公隱埳塲敬通悲惟應延藻
月泛瑟慰遙思

日蝕

日蝕元徵異千官集禮闈遙知薄海國同候太
陽輝夾道喧鼗鼓承旛麗珮衣時無梓禪輩誰
與測幾微

立秋日和王子惟楨

園中日照微草際泉流潔徙倚眷茲辰胡然屆
素節澄霞稍異色淒氣俄以結簷鳥行當辭林
蜩鳴復絕層雲捲猶浪餘花落如雪清風徒自
多蘭茗不堪折美人其惠來登携眺寥泬

早秋述詠

流火忽云屆清風結我思草虫悲索處蕭葛感
驚時霞曠芳樽適雲深碧海期鄭興不復仕蓮
勺邇方辭

秋夕

颯颯風氣涼漫漫夜何長感物念易集客子憂
多方櫺軒散余矚皎月流素光川途夕筆亂巖

際高雲揚星迢急還烏露下悲寒蟄以茲春徂
景況乃懷故鄉愁來填人膺誰能假瑟簧

中秋前夕不寐

小庭華月色永夜坐清輝故國人頻憶滄江舟
獨歸且憑孤影慰莫歎寸心違無奈休文病時
詩省帶圍

十六夜月二首

待月坐江水月明江正流長吟惜佳景高興在
南樓魯酒碧山醉胡床清桂留有情望今古寂
寞漢宮秋

其二

牛渚風流地關山萬里長今宵懷謝尚江上益
清狂勝事亦云盡佳期不可忘涼風吹舞袖白
苧滿秋霜

雨

燕京又八月愁度散絲朝涼氣霑扉重雲陰布
野遙晚聲傳院杵秋意撼林飈北眺氤氳色懸
知傍九霄

九日二首

金祗辰屢改玉琯氣方遒肅宇瞻霏淨遙汀識

潦收鷓鴣鳴入怨柱蛩響切離稠楓落他鄉早尊
寒故國秋賈生嘗遠謫平子本多愁迥榭聊憑
覽難銷寓日憂

其二

蕭辰倏云季並應值茲晨落桂銷寒嘯遵鴻引
暮津河虛平夕霧閣掩澹秋塵素月昇逾靜高
霞歛更新調絃空對酒倚檻重懷人欲寄相思
曲浮雲不可因

帝京九日

清秋是節最嘉祥魏主稱書悅久長已聞勝麗
矜高會况復遨遊屬帝鄉曉結香輪馳玉岸晴
飛翠憶駐金塘才人錦簇盤龍帔公子雲搖七
寶裝朝回競接千鍾宴射罷還臨百戲場姣服
姁媮齊致態紅顏睇眄轉流光華燭初熒羅袖
舉梁塵欲下綺絃張俱言獻壽情無極共惜爲
歡夜未央羈客登臨時已晚天涯風物思堪傷
獨倚青霞閒陟榭徒對黃花不盡觴求友開襟
眺芳甸故嶺迢迢那可見何處網緼海上山苦
聞嘹唳天南鴈嗟予六載客華京誰憐宦學兩
無成官拙只言題漢柱力微不解請胡纓顏駟

爲郎幾度秋子州多病自幽憂抗雲擬荅班生
戲俟河學賦仲宣樓坐憶吳臺舊風俗携舟帳
飲滄江曲零落淮南幾株桂惆悵東籬數叢菊
禁林終宴出層闈青驪更向小平津北門微懸
衡漢影西山遙靜屬車塵忘憂竹葉情非昨辟
惡莫房鬢是新欲逃神虎辭明代且托靈魚報
故人

九日北峯臨眺偕同省諸公

褰帷漱灑歷禪宮更踐莓苔雲逕通載酒登龍
聊暇日揮毫倚馬見群公語迴斜照岩容變坐

度冷風海勢空俯檻驚時還極目江天何事有
飛鴻

搖落

搖落滄江上驚心歲月徂看花憐曉鏡倚杖惜
良圖排悶劉楨好沾巾阮籍途還聞閉蓬戶獨
酌似潛夫

郊泛秋懷

緬予滯河魏嘗亦賦懷田衛水歸華急江鴻旅
思懸役車離歲月稽事近霜天更逐樵風去滄
洲何處邊

秋夜憶山中

悵茲豐景淪感此流暉馳青霄有翔隼落葢多
寒枝徒對盈罇酒美人不共持聊且娛心憂華
月泛金池意隨流波結情逐孤雲移猿鳴鶴以
怨歲暮何遠爲

抄秋索居即事

索居坐度玄陰結今日煩憂未能說遥睇江頭
不見雲可堪鬢裏新成雪風落寒郊葉下頻濁
醪踈雨自相親欲向東籬惜酪酏其柰黃花偏
傍人

寒朝對菊獨酌命篇

晨起望寒山曠然謝羈紲雖值風雨晦美與囂
塵絕踈花破孤聞靜心自怡悅小室幸易安清
尊誰能缺興想籬下人高名照雲霓白頭何爲
者方欲理宦轍

寒夜獨坐

宵陰自虛寂獨鶴林中歸行度桂華晚坐令心
事微滄洲間處是青瑣夢來非無客慰孤影悠
悠寒月輝

林居歲暮

苔徑下雲陰蕭然坐石林一為顛顛客頻感歲
時心琴憶鍾期聽山懷向子尋清尊休放却所
慮日應深

歲暮夕坐獨酌成篇

崇陰寂玄景窮律款宵期玉衡稍流映方冬寒
彩微天高霜氣結何能覩雲輝惟我客游子苦
顏心屢摧掩閨不成寢朱火暖單帷蕙蔭久已
歇瑤華誰獨貽臨觴意空縟懷春悵有違願言
假桂檝容與清江湄

卒歲詠

年過四十頭二毛九命一官仍散曹長嘯歸來
何所有耕罷陂田臥虛牖病居誰賣尉佗裝放
歌日醉淵明酒春風欲到五柳枝旁人不語心
自噙歲去年來只如此跌宕文史徒爾爲

歲暮對雨獨酌二首

愁坐衡門裏蕭蕭雨助寒誰憐澤畔客放逐歲
華殘

其二

賞心終不有徒對一樽開爲語春風道無煩谷
口來

江南臘月

不見垂楊與綠蘋江城烟色雨餘新
數家竹樹輕寒外一道溪流淡蕩春

癸卯除夕直北曹作

獨馬向寒烟青陽春明發霜淨肅蘭池雲沈迥
丹闕林阡麇易聚江天鴈難沒風物悵徂陰芳
菲詎久歇紛庭默多惧巖闈坐愁越夙心愧盈
尊含情非華髮

除夕與孔學憲

掩閣機乍息馳陰念所滋春茲不遑寧平易浩

無施趨曹薄季冬去國復迨期俛仰一世間松
喬誰能為漫日靄湖陽雲山有餘悲之子惠同
襟委化開予思謹爾綢繆故聊以忘歲時

皇甫少女集卷四

皇甫少玄集卷五

少玄山人吳郡皇甫湜撰

燕會

傾金罍歌

吳王城裏花如錦東風吹愁復愁甚花間莫遣
空金罍臨流折花勸君飲勸君飲君勿辭月光
花影常相隨何爲失足太行道坐令齷齪愁雙
眉桐陰未落秋風起夕陽慘澹東流水浩歌荷
鍾蒲萄春古來痛飲真難比君不見百花洲上
空蒿萊城鴉暮雨江聲哀碧山江頭更今古麋

鹿又繞姑蘇臺白楊蒼苔幾人在清歌妙舞何時開不如攀花對明月與君夜夜傾金壘

高杜諸君同集

曲徑雲深處幽窓雨過時村墟隨地僻花鳥怨春遲綠酒追朋好青山隔夢思開襟對公子高興戀佳期

周君弼過集

北來冰雪廣陵船驄馬逢君暫酒筵即喜冠裳重會面祇傷岐路易催年一庭蛩響秋聲夜萬里霜華塞上天擬盡清尊都不惜浮生牽率共

風煙

朝天宮李真人房宴集二首

沙色凝和日鳴珂晚霽開松穿紅徑入芝繞碧欄迴洞室涼衣袂雲霞泛酒杯吹笙下群鶴香霧散瑤臺

其二

琳館秋光澹來看絳節朝靈花搖晚砌仙樂送林飈道性怡魚鳥塵襟淨次瀟皇居明片月佳氣拂叢霄

不覲周子五六月輒相思夜過命酒殊

慰作

春花蓋方綻春月光向闌花月不相待幸此興
思端別友豈盈旬闊若芳歲殫中宵忽我顧壺
酒良足歡誰滋九華艷坐失綠綺寒幸及春未
暮相期共游盤

秋宵宴會與周山人以言

嘉賓眷清夜相與娛思憂憂思沈中曲一別屆
徂秋顧念處世間快意焉可求別易會獨難世
短歲復道促襟展謔浪感此極歡遊明月懸中
天芳華隨觴流妙歌激雲漢為樂四座周抒情

告君子太康毋我尤

秋燕詩五首

其一十三夜望月

歡襟佇瑤賞冰除迴風臺縣睇雲之表側遲織
輪來露輝染霧縠舞者立徘徊玄兔雖闕彩流
藻盪芳埃玉華坐成緬金尊空復開畏盈戢景
曜遐觀思悠哉

其二十四夜微月

廣庭淨霄色良夜悅流翫况對巢箕人同懷發
幽讚散步林暝交微星吐華粲彼美雲中魄徐

駕升清漢玉彩含霜來金霏隨風散繁絃起兩
階孰知我心亂

其三十五夜月

與子良宴會歡娛值茲夕延首瞰絳河素舒將
焉適昌暉曠重雲餘光幸鑿席漏彩絳翹瓊流
輝函缸壁客意方厭厭愁隨華醺釋美人婉清
揚跂予萬里隔

其四十六夜雨

明月有常玩圓景亦不易三五昨已邁人生良
如寄興雲結長霄清暉何由被弦望相推移賞

心邈難嗣即事可逸生取樂在適意綴我巴人
響歌之聊代匱

其五十七夜月

清風歷網戶皓氣流中庭佳期殊惠來金波耀
華星諒知蟾兔缺髣髴素娥形爲樂貴及時百
年詎我齡放歌目馳藻結思凌高冥且念叅酒
德萬物如浮萍

郡公海邑行臺夜燕

惟昔忝嘉命儷步雲龍賓從容崇蘭省劔珮鮮
芳春翻飛未云已委翮隨風塵予放大河汭爾

遷湘江濱沅芷豈不茂采之竟何因王猷眷符
守騰搖歛來臻樂我桑梓化絃聽懷清淳觀民
戾雲海褰帷眺溟津政和信多暇展讌平生親
華星泛淪連悲歌激潛鱗君子隆直道令名日
以新嗟予抱沉憂慷慨終焉陳

子循至都

平原極目愁雲滿羈客此時腸欲斷寄遠空題
塞北書含情屢奏江南管爾返金門鴈正飛還
從闕下偶驂駢眼前世事不可道且共酣歌醉
落暉

王子維楨道蘇喜晤

爾向閩山曲余尋衛水源投荒情共迫去國恨
空存旌節胡然駐心期更此論江湖瞻魏闕猶
自暗銷魂

虞山逢故人陸子舟泛

海縣逢幽客清溪共此觴坐依筠日澹吟望島
雲長洞闕紅霞落堤暄翠羽翔桃源舊相失杜
若幾回芳

夏日寓廣平章成安觴于南壇移席泛

舟

繡陌轉彤垣珠阜對綺樽春芳臨藻宇延賞命
輕軒林密雲滋靄風清晝不暄壇虛流漢影川
麗隱花源棹舉滄波逸帷張落照繁君王憶洹
水上客想平原沸浪歌絃合凌霞舞袖翻賦詩
酬勝槩搦管愧璵璠

章丘李生隨父之越中過謁

之子來吳會隨雲指越丘相過故人意翻動索
居愁林鳥鳴催暮江霞思入秋情遷係深感爲
我暫停舟

十九夜雨子約卷燈之宴

雨館隱芳菲宵寒藻焰微似憐辭畫棟猶自照
羅衣把酒節方過驚心春易歸厭厭永茲夕不
醉爲餘輝

許子子春水部北上過訪

南林閉關者自愛少逢迎忽枉雲龍駕暫依蘿
薜情相歡對尊酒不用論平生且念朝青閣宦
途多晚成

醉後歌

黃生携酒見過追憶勉之併贈周陸

二子

文疆好我携客俱二子况是高陽徒北窓桐陰
已滿地幾日不醉黃公壚西山入簷恍蕭瑟清
雲擁座炎暉無爲爾青眼復舒嘯有懷浩曠凌
長湖當筵賞會意未已翩翩汝曹氣相似夙昔
自許求羊期後來勿替荀袁美酒闌樂罷哀有
由令我感激悲藏舟五嶽煙霞時縹緲可憐玉
樹埋荒丘相看一生盡垂白已覺萬事隨東流
早晚罷官泛滄海從我者誰陸與周間呼二子
目相見且與痛飲銷煩憂

夏夕雨後命酌同周子伯氏并氏得頭

字

冥陰淨窓竹池上雨初收坐覺寒泉瑩仍憐芳
杜幽故人與斟酌清夜愛淹畱應附三何躅雲
門可白頭

夏日過舊居亭子

小亭消暑過園徑夕陰開池靜閒雲覆風清幽
鳥來自多濠濮意虛負洛陽才惆悵東軒月猶
看照酒杯

集談氏園亭

幽興偕仙步名園集綺辰檀欒題賦客巾拂舞

花人落日臨池好行雲繞座新黃昏催秉燭更
益畫堂春

燈夕遇周子時予將北征席上作

不見忽三月相逢驚早春梅花催送客柳色更
愁人舞屬華觴急燈迎甲夜新追歡各自勉少
壯豈吾身

春日金元伯見過二首

當時好文客頻過旅人居及此歸來日翻憐會
面踈花前茲夕醉湖上隔年書意氣君休問嗟
今已不如

其二

有客乘舟至方予屣履迎園林春自入門徑晚
初成藹藹暮鐘動悠悠江月生鹿車花畔酒還
共爾心傾

郡守招飲大雲菴同用春字

愛爾符竹暇悠然江海人還如永嘉日復似敬
亭春鹿岸鐘聲近雲門杯酒新贈言陳仲舉畱
榻待情親

南還過致甫齋中

閭門翳林徑信是蔣生居呼酒何知客論文獨

啓予開軒娛景夕延月照襟虛直覺緇磷久彌
傷行役餘

竹堂

香積藏深竹雲寒鐘磬微踏花迷雨徑入鳥到
林扉真想行猶在浮踪悵屢違來茲耽寂樂清
夜坐忘歸

過莊道士登紫霄峯對月

夜訊靈峯隱言追羽士歡洞林雲處合風露死
邊殘縹緲星初散蓬萊月正寒不知人世裏思
欲命飛鸞

雪夕醉歌別兄弟兼贈周山人

昔與兄弟別暮春溝水頭上林花飛不相待青
門柳色偏含愁遙過京口滄江路抒情漫屬歸
田賦谷口蘭枝芳幾叢窓前棗萼開無數東時
西流不可期感此歡離復悲聚良知周子求羊
儔十年再得論中素高眠未厭支峰雲客心已
亂維楊樹蹉跎世網苦自嬰氛氲別日誰能度
江城携手得幾時我今暫與雲山辭懿親開筵
日飲餞故人戀戀車行遲燕吳氣候邇相似二
月雪點黃金卮長安何在天北垂側身長望涕

流離驛樓新柳煙正滋夢中碧草盈前池繁絃
急管滿座悲心若焚絲豈能治奔走一官衆所
嗤獨馬飛塵空老爲羨君不出東岡陂

飲寄寄亭贈張地官

放舟山陽道夕逗清江湄相逢蘭省彥如攀瓊
樹枝引徑竹方翳升堂霧稍披解袂醉古亭傾
蓋欣良知出雲本無心遙去北山垂對此感浮
寄欲別情彌滋落日遡淮水盈盈牽所思

集張水部安平祠亭

眷此他鄉晤開尊慰旅遊如何苦奔峭還得狎

林丘水部嘉文藻山亭藹獻酬烏忘移席下樹
戀息陰留維嶽瞻斯在清風挹未休朝宗欣有
託河濟正安流

雨夜孔文谷見過

浪迹寡吾與逢君慰所思升堂慚座客入室羨
文辭木葉城秋後窓燈夜雨時敦交值茲晤寧
止樂新知

越城晤王戶部維禎三首

幾發金陵江水湄西看江樹悵然悲傾尊不解
離人恨此日相逢異昔時

其二

雪殘湖上淨寒氛斜日天南鴈數群失路更爲
吳會客共嗟身是一浮雲

其三

年少曾爲台嶺遊却辭金鼎事王侯憐君不跨
飛梁去目斷仙源無限愁

昭慶寺翠筠禪房同孔學憲

城樓隔深竹龍象宛湖隄况復蒼蹊暮閒聞幽
鳥啼情知多惠好靈境數招携惆悵寒山路雲
關處處迷

集竹堂僧舍暮歸

偶來竹林寺愛爾棲心幽盡日松雲度閒扉溪
水流永耽石室卧誰羨玉京遊戀此復歸去看
烟多瞑愁

皇甫少玄集卷五

皇甫少女集卷六

少女山人吳郡皇甫湊撰

燕會

過許子春飲錢朱二子並至

良辰肅予駕行行造友廬會面欣夙昔英賢豈
時虛隆義薄言欵披襟情則輸命酌忘景夕揮
尊但無餘旨蓄賤八珍中筵貴雙魚懿予值二
子並宴此城隅孰云匪密親情好與之俱發篇
溫以則幽念靡不愉矢言在無忘茲樂不可如

過昆侖有作

徂節啓陽煦策馬聊行遊玄思先民軌從之戾
園丘依仁竊所奉鑑跡表相謀斯心惻遺賢局
步曷能由豈惟善文藝惟日覬德休越哉尚牽
世芳酌不遑流踰江懼特操何以喻吾憂翳翳
岑表月微輝東南流跂予建德邑需子爲輕舟

雪夜醉後歌

憶昨倉皇暮途別我行遄阻黃河雪長安一卧
歲復盡朔雪滿地無過轍開扉立視默惆悵北
風吹人意不悅蹇予幾逐漁父老回首思之豈
堪說只今留滯終安歸敢與多士論光輝苦寒

亟謀良夜飲二子知我平生希錢君隱迹滄海
頭向來調笑公與侯文雅如包更年少華亭鶴
唳聞清秋攀龍升雲一朝事成功報主何所憂
公車履敏志自得軒冕於我如雲浮明堂本非
一木構百川萬壑皆東流至人乘物自無我世
上磊落誰其儔忘形呼酒共深酌寒條颼颼氣
淒索雲天乍疑萬井曙雪色近繞蓬萊閣酒闌
携手瀉我心遇友開襟且爲樂生來不買孝廉
名樽裏能忘步兵託眼前聚散即可料故園梅
開幾枝落歌成一爲智者言孤鴻自此翔寥廓

許子酒後放歌行

淒風謾謾寒氣多歲云逝矣憂如何委羽何由
見白日吹律未足回陽和從來䟽理只能暑幾
日僵卧無經過東曹許子呼我飲喜踏積雪迴
銀河開堂一笑暮愁釋相顧皆稱永今夕燭前
莫遣杯行遲生逢四美尤堪惜嘉招况值雲龍
會吾衰亦謝山林客諸君濟濟匡世姿強將腹
毳隨風翮酒闌披豁意更遠天街如霜月華白
移尊飲滿臨當分聽我狂歌歌所適古今賢達
知幾人苟不達命終何益君不見黃金臺上月

如鈎荒臺沒盡月仍留千金買賢不買駿下齊
七十誰英流孰知人事一朝變向來誼合真可
羞入江不化等閒事河上之恨長悠悠又不見
荆卿報恩西入秦當時意氣傍無人酒酣上道
髮上指咸陽宮闕揚灰塵嗟哉倚柱竟不就身
摧志辱爲世嗔儂行偏袒盡誰爲但有易水流
千春申我歌進君酒我心如雲爾知不明朝縱
使得失異焉能爲之成疾首

雨中陸子飲話不寐

憐君千里外然諾重黃金僕馬追游苦風塵感

嘅深清燈孤坐久細雨別愁侵耿耿何由寐晨
鐘達我心

雨飲朝天宮王鍊師房

客有青霞訪花藏帝境源油雲合並馬過雨及
留尊密館涼頻入重林翠自繁從茲滌塵慮數
欲問玄言

六月廿二日偕同年楊嚴劉包四君赴

錢君汝載飲漫賦短句

羊曼曾真率君心實可方招邀群彥集燕笑旅
情忘潔宇沉宵謚華星覆院涼明朝有離合那

惜盡餘觴

七夕同二錢浦劉四君集包君元達寓
屢晤矜朋好今乘令節過况逢嘉月吐似向客
尊多回首仍蕭菽忘形暫薜蘿未須故園意無
限抱明河

對月陸子共酌

復對長安月金風尚未闌病襟孤自照旅盞一
爲懽故傍滄江遠常臨紫塞寒團圓亦不易誰
惜夜深看

同許子春林熙載朱時言包元達集錢

汝載寓分韻得四支

月下留驂意霜輝到酒遲聚星人世少此夜客
情滋素髮安仁賦黃花元亮辭江山待雄藻汨
沒任吾之

同錢浦白包呂五君集錢執夫寓

客裏清宵會悲秋心事同忘形有吾輩握手意
無窮雨色生殘樹邊聲度早鴻不須投轄飲自
使綠尊空

月夜集同年楊啓潛寓

暝色高筵接鄉愁暫一空驂停木葉下醴汎月

華中仙侶慚予並佳期惜此同雲陰莫遽上欲
眺鳳闈東

同年謝子過訪畱酌

暫駐高軒笑語聞旅庭幽寂下斜曛二毛今日
欣逢主五載同游得並君暗起花神銷苑月徐
開樹影濕宮雲情來忽已看陳跡何惜餘杯入
夜分

秋日携酌同栗子過少岱子寓率就短

章

晚日追尋梵宇偏客中携饌媿蕭然頻傷會面

丹陽宰近喜同心上黨賢把盞莫看風葉下開襟真傍露華鮮晉山吳水行俱遠長笛何由到別筵

同浦包二子集沈子舜臣寓時沈恤刑輔郡還嘗爲予致音予四人實偕秋薦也

及時霄漢下恩波漢甸芳菲擁傳過江上素書今到少月中仙侶並情多星文北極胡爲爾烽火西關近若何酒罷聽雞渾不寢憑軒眺望一高歌

昆侖山人西行歸集

躡履迎賓情太紛花天看鴈仍思君驅馬逢多北門雪開尊笑共西山雲狂歌落日且未已憶昨壯遊殊不群華嶽諸仙杳誰待時瞻鶴駕空氤氲

昆侖欲登華山不果

諸戊子同年讌集程氏

明德崇休紀文思光寓縣河清表靈奧七祀熙風荐徵辰恢舉孝旣登越裳獻經揆渥神人聲明歛葱蒨矯迹翼華朝隆軌孚英選新都啓丹穴鳴飛戾清漢薄質久湮淪謬齊排雲翰虛乏

予所安寅恭爾先宦不悞值後塗時亦叨芳薦
存故激人衷懿款申娛讌繁肴充綺席照灼蘭
膏粲迴星錯幽曙酌醴方無算敦義良在心中
飲彌歡歎頽姿不克妍仰懼辱明鑒策足菲妍
期申章聊可見

上元夜對酒

早春逢麗節况復在瑤京永夜惟看月空庭亦
自明繁華時屢改留滯蹇何成徒對芳尊酒彌
深徃歲情

逢徐汝佩

相逢汶水道同愧洛陽才回首無窮事春風幾
度哀浮雲鄉國杳流火暮天催自顧空簪紱君
還滯草萊

同汝玉集時言寓

言值含香暇行追秉燭歡同懷情不間四序景
方殘峻闕凝雲夜平沙度雪寒芳菲瀉花醞寥
廓倚星欄間有杜欽好愁無平子寬故園梅柳
發何計覓歸鞍

元夕同張昆侖朱時言集吳純叔玄寧

觀寓玩珠蓮燈分韻得蓮字

太液誰分七采蓮珠輝藻繡照歌筵懸來錯落
河星爛散入繽紛月露圓地接雲霄爭麗色人
逢鸞鶴共韶年此時琳館題詩別他日金花賜
對旋

余與民則別倏踐三載茲甲午初夏民

則來遊京師過寓命酒道故用述短

律二首

門有車馬客來經道路賒開樽延桂月解榻對
榴花池風時泛爽城陰屢作霞悵然惟疇昔會
面重驚嗟

其二

香街披上苑客館兩層城綢繆永今夕陳說盡
平生花迎舞燕落藻逐戲魚輕相看韶景暮眷
此故人情

夜宴孫君林亭

偶乘滄洲棹來尋谷口扉故人隱松菊邀我坐
芳菲曲度山月落情搖海雲飛君雖卧秋壑無
夜不春暉

季氏亭燕對菊

季也黃花酌依然故里歡留芳度久序遲候賞

秋殘細艷雲藏暖
踈陰月到寒傷心
倦歸者容易兩年看

十四夜偕我兄弟友人陳周二君閒步

圃中戲乘小舟聊述紀興

吳閭繁華地上元
佳麗節燈火連萬家
遊騎紛填噎吾曹
抱憂痼蓬徑寂無轍
靜夜乘幽興步趾蕩
煩懃棣華自暎蔚
因之心則說况值嚶
鳴友清尊幸不缺
塵遠芳林虛月近
寒塘潔齊發采菱
謳試鼓滄洲柁忘
形展戲譚憑以慰
羈紲予本丘壑人
安能久朝列反憇
愜幽棲稍稍塵

累絕澤蘭自茲佩
園柳忽堪折娛性
得其真養素良爲
拙誰今日縈思頭
顱坐如雪

子約亭會

塵遠亭居寂林開
霽色微水迴蒼竹
逕山對綠雲扉梅
影清臨坐蘭香暗
襲衣風光自可悅
花萼復相輝

來鳳亭集

中林一延賞小苑
足風花高響流清
籟長陰覆綠華水
檻琴心靜山扉雲
望賒竹氛含早露
鳥影曳殘霞會可
娛芳夜無愁繫日
斜

懷子新東溪舊隱早春同宿舟中作
膾仕吾遊倦登年爾望踈歸情同信宿往事獨
躊躕柳外寒烟薄江邊晚照虛東溪考槃處不
到十年餘

秋曙山行訪顧叟

烟蘿入迢迢湖岸涵空明携策問幽事懷人滋
隱情滿林秋雨散一徑曙霞平就此樓居者雲
霄逸我生

秋日自虎橋移舟訪朱子羽山居

春辭五馬到雲莊頭白知君舊省郎二始風流

誰得似四愁心事耿難忘歸來獨臥青山遠不
盡懷人秋水長悵望桃源遊未遂迢迢孤月限
河梁

夜訪程士希舟中

清風動幽夜坐愛滿溪雲明月期何處虛舟宜
對君淺流茲夕見歸鶴幾年聞玉室如相訪煩
書及右軍

王維楨見過

之子趨朝罷摠轡驚華天官河方隱曙沙柳尚
餘烟執手申情款蓄意兩俱宣高文旣已富妙

辯一何妍朝霞未足綺秋氣聊共鮮雲日鸞臺
麗酌酒命新篇清風迎條舉文波逐藻圓解爾崇
蘭佩馥我幽桂筵

皇甫少玄集卷六

